

摘藻堂四庫全書薈要

史部

欽定四庫全書薈要

史部

硃批諭旨卷一百四十二下

詳校官編修巨繆晉



欽定四庫全書薈要卷八千八十三

史部

硃批諭旨卷一百四十二下

硃批王柔奏摺

湖南辰永靖道臣王柔謹

奏竊查新聞六里一切善後事宜除臣已移會藩臬

兩司詳請督撫核

題外謹先摘大畧恭呈

御覽一城垣官署營房宜速建也一兵丁月米宜給本

色也一各里雜糧宜按戶均攤也一民苗宜准結
姻親以潛移習俗也一苗人宜分別良頑以示勸
懲也一請設義學以廣教化也以上六條是否有
當伏乞

皇上睿鑒謹

奏

該督撫題到之日自有諭旨

湖南辰永靖道臣王柔謹

奏為再行奏謝伏乞

聖鑒事竊臣前為新闢各苗土地方請添設鹽引一件
具奏奉

硃批諭旨鹽引國課攸關且係創設例應督撫題奏之
事欽此臣遵即將前事具文通詳其准行與否至今
未經議覆且近查此新闢各地方准鹽既以路遠
而價貴川鹽又以私販而阻禁該地方食鹽現今
每斤價值幾至四分民實難堪臣因思此新闢各

苗土地方原未經設有引鹽是臣前議之無病於
商也明矣況引鹽設而裕課利民亦未始不有益
於

國計再查此苗土各處去川省重慶府屬之產鹽處
所計程不過六七百里而道途之水陸各半至距
江省淮揚兩府之產鹽處所則相隔三千數百餘
里其引鹽之運行自當遠貴而近賤則此地之應
食川鹽無疑矣但念邊徼偏僻其民人之殷實者

恒少更恐以招募外商而致滋各官之需索與遲
疑指勒之弊竇臣反覆籌畫莫若查照川省引鹽
之例請借支藩庫帑項即令新闢各地方官承行
運銷照時價酌減發賣除辦交國課外其所獲羨
餘銀兩先行扣還帑本後則據實歸公既不誤課
更為便民相應懇請我

皇上俯念微臣為

國計民生起見可否將臣前後兩議

敕部議奏此臣一得之愚理合再行

奏明伏乞

皇上睿鑒施行謹

奏

戶部速議具奏

湖南辰永靖道臣王柔謹

奏為新兵之浮設宜裁謹據實奏

聞事竊臣伏念兵為民衛餉為兵需此皆經國之要務

而不可使其有餘與不足也近查鎮筵四營於額
兵三千外復請添新兵四百名臣意以為似應仍
遵舊額無需復加竊考鎮筵之設鎮及分中前左
右四營添兵至三千之多者此本為鎮筵之西北
邊外合六里為一區域其幅員千里該苗民之兇
頑者多表裏為姦猖獗無忌故於沿邊以內會議
以邊營代邊牆為一帶之堵禦此所以有方鎮與
重兵之安設今六里業經開闢其分撥幅員之五

百餘里者已設有永綏協營安兵一千六百名以
為彈壓是曩昔鎮營之所堵禦於邊外者今已分
去一半矣至查目今鎮軍之所管轄苗疆界址則
自西南之鳳凰營起由鎮城而直抵東北之喜鵲
營止其延袤不過一百八十里再自附近民村之
沿邊苗寨起直抵西面之新設永綏交界止其橫
寬不過六十里至鎮城更係從前所改五寨土司
地方除東南一帶盡屬內地其餘西北之二十里

以內者亦悉係民村是合茲苗疆之幅員而約計其數亦僅五百里即較諸永綏之汛地亦未見其或多惟以鎮標之額兵三千名較之永綏之兵止一千六百名則為數幾於加倍況查鎮標所屬之北鄙其向之毗連永保等土司地方者今又建營設汛已成掎角之勢若是則鎮標之舊設額兵三千至今日而已覺其多也乃前鎮臣周一德復請添兵四百名又何為哉臣於此事始則未獲預議

繼亦未經奉文然不敢以浮兵糜餉之事瞻徇隱
默以自處但念此件經督撫提臣會題今臣復將
浮設緣由據實具

奏如蒙

睿鑒或將臣奏摺仍發交本省查議勢必將愈加回護
惟懇我

皇上特命親信之

欽差同臣於鎮筵及永綏一帶苗邊通行踏勘併於鎮

算四路營汛斟酌布置繪圖呈

覽庶虛實自彰而臣心愈白矣謹

奏

此奏是候另有諭旨

湖南辰永靖道臣王柔謹

奏為奏

聞事竊查辰永靖所屬州縣及新闢永綏地方上年雨水霑足百穀豐登農民咸慶大有惟因安設六里

及應援黔省官兵悉借支辰屬各縣倉穀碾備米
糧運供軍需迨冬月買補還倉故現今之米價凡
倉斗每石有賣至八九錢不等其於冬月至今則
雪雨應時田土大獲潤澤腹地安康邊疆寧謐理
合據實奏

聞謹

奏

深慰朕懷

湖南辰永靖道臣王彛謹

奏為籌畫治理邊疆之永圖敬抒管見仰祈

睿鑒事竊照楚南苗土各邊徼叨蒙

皇上仁慈普照有見夫各土司之暴虐與頑苗之仇殺
不忍棄於化外急思登諸衽席

敕諭楚省臣工先後經理建官分治設兵彈壓併不惜
動支帑金之浩繁其所以為苗民謀生全者備矣
但既經設有官役之治理弁兵之防衛則其為俸

工之支給與糧餉之請領是每年各添此數萬之
經費而不可以稍減則凡臣工之承辦者理宜謀
此經費之所出臣反覆思維欲求經久之長策莫
若及時開墾隨地興殖之為善也大張開墾之示
檄飭腹地各州縣查有家室之農民而身無過犯
者准本地鄉保出具甘結該州縣具文申送該府
廳點驗以憑安插其各邊徼之荒土則曉諭該苗
土等令各據實呈報更嚴飭該府廳與各縣務再

遍歷查勘除先儘苗土認領墾種外其餘山林地
土之猶有棄遺者則約計畝數分給各招徠之農
民認承墾種統飭該廳縣編造魚鱗冊申送該司
道存案查考照例五年起科以憑轉詳督撫題達
如此則野無曠土自民多餘糧而官兵之食米易
於覓買取資無盡矣至科糧久有定例查田分則
因則起科悉屬寬大便民之典固已較土司火坑
之苛徵苗目保寨之科斂其輕重已大相逕庭則

苗土良弱者諒自無不心願而樂從也其地產五金之處則准令該地民夷之採取而外來之姦匪禁焉以及山之材木拱把者則令其封禁而畜植合抱者則准其採伐而興販悉令按例輸稅如此則邊徼之民夷更悉將於農忙而用力南畝農閒而有事興殖將見衣食饒裕而咸有身家之顧忌自不肯聚集為非矣迨果家富人足其興行教化之道亦即可次第舉行其新設之各府廳縣等則

責成加意治理即於此奏效之多寡而分政績之優劣予以勸懲如此則利無不興夷無不格而吏無不勤其兵糧無資於外糴俸餉無損於額賦固大利於民生復有益於

國計矣為此繕摺具

奏伏乞

皇上睿鑒施行謹

奏

候發廷臣議覆有旨

湖南辰永靖道臣王柔謹

奏為分貯各府州之帑金宜預為防範以免侵虧事
竊臣於雍正九年春接到通行部文內開奉

旨為各州縣辦理軍需與應付急切公務之用不容刻
緩蒙

敕諭大學士等議奏著該督撫於各省藩庫內酌留帑
銀數萬分發於各府州庫存貯以備應付欽此欽遵

奉行在案臣伏念此項銀兩計數匪少且為預備
急切公務之需更所係匪輕但分發於府州各庫
存貯此非如隨發隨用而報銷迅速之項其中稍
有虧空即難以掩飾者可比使於此而不為防微
杜漸竊恐不肖之徒平時任意侵那惟專探上司
一有盤查之信即暗向所屬紳衿與舖商等那借
墊補俟該上司之實貯印結一出盤查方回而此
銀亦即潛還原主即遇有急切公務之用彼仍復

左借右那隨時掩飾而不露倘遇有叅革病廢離
任事故其虧侵之銀數則不能不水落石出雖將
該員科罪勒追而帑項已虧一旦遇有急切公務
之需勢將坐視其貽誤所關非小臣因慮及於此
再四思維以為此項銀兩雖已分貯於各府州庫
內而各府城之有首縣與各直隸州之有學正者
即責令該首縣與學正為監察令於該府州庫內
所分貯之帑銀悉將各包封編號而於每百兩之

封內其散銀之錠件數目更行詳記復令造印冊
五本按照號次開載其各號封內之錠件數目俱
詳註於各號之下併令該管道員親同查驗各加
押封更於各冊加印鈐蓋除印冊四本分齎督撫
司道存案查核外其下存印冊一本則發交該首
縣與學正收貯以便遇有急切公務隨時監同府
州按冊照號逐次支用一面即於詳內開明通報
該督撫司道查核再各府州庫內所用貯銀木櫃

之鎖鑰責令該首縣與該學正親加押封其鑰即封交該府州收貯如遇有開用之時該首縣學正等俱即面同該府州支取仍即親行鎖閉照前押封併於詳內聲明至該道員之四季盤查務當按冊查號復抽封點數倘遇有舛錯虧短不符者則其為侵蝕借墊無疑矣即准該道員立將封內之錠件不符銀兩齎解撫臣查驗併將借墊之府州與監察徇隱之縣學一同揭叅俱嚴加議處著落

催賠倘該道員徇情容隱一經該督撫藩司查覺
除該道員叅革不用外仍於該道員名下查照該
府州之借墊銀數罰令額外賠出如此則侵虧之
弊端永除即遇有急切公務亦必不致有遲誤之
虞矣為此繕摺具

奏伏乞

皇上睿鑒施行謹

奏

嚴密稽查以預杜虧那之弊主見固是但所設之法未免過於瑣屑候另旨飭議

湖南辰永靖道臣王柔謹

奏竊臣查鎮草所屬紅苗既經開闢安設四路營汛所有應添文員及善後事宜除詳明督撫轉

題外謹摘大畧

奏明

一紅苗素皆耕種山地不諳開濬水田故一遇旱

潦即多歉收因致偷盜難禁今既經開闢化導懇
請

敕諭楚省督撫即於今秋豐收後動發公項銀兩飭令
乾州同知鳳凰營通判各買備雜糧五千石於所
管四營苗地查適中處所酌建倉廩分貯春借秋
收倘遇荒歉即令賑濟至永綏地方亦令一例遵
行庶苗民得免飢餒咸感

皇仁浩蕩自益蒸蒸日上矣

一鎮草紅苗既經四路開闢雖從前設有百戶催糧約束然該弁悉屬鄉民恐私作威福及需索情弊今查有鳳凰營通判屬內之池河營與應仍歸乾州同知屬內之地良坡既相隔寫遠兼係紅苗適中之地請各設巡檢一員就近稽查以專責成一鎮草四營所屬紅苗內舊有逃匿刦殺兇犯與滋事苗目此等最易為愚苗之煽惑難以久容應令該管文武確查舊案除已奉

恩赦外其餘各案兇苗逃犯先行密報並即設法誘拏
按律治罪如應克發者亦即援例克發以除嗣後
煽惑之害不得仍援九款例枷責了局庶姦惡除
而愚苗自悉歸於馴良矣

一乾州城垣與該同知所管屯田秋土俱雜於瀘
溪縣屬界內遇有民人犯事既多借地躲閃迨經
移文查拏又多聞風遠颺此歷來難治之根由應
令該廳縣清查疆界各編保甲以專責成再乾屬

之二三四里土民歷來設有鎮谿所土千總以為
專汛但念該弁籍隸本地不無親族恐多瞻徇偏
袒請將土千總裁革於乾屬適中之司馬溪地方
改設巡檢一員以便管轄治理庶免苟且因循之
弊而地方日有起色矣

一乾州自西南城外起抵鎮草城八十餘里所有
田土民人俱係鳳凰營通判管轄故乾州同知於
附近村民之為非者素多不受約束該通判又多

鞭長莫及臣因飭該同知通判面議會定於適中之洞口哨地方畫界各分四十里就近治理以專責成再鎮筸四營苗地從前因乾州管轄六里其地方遼濶故曾將右營苗地亦撥歸鳳凰營通判管轄今六里既經添設永綏同知則現今乾屬僅有左營苗地一處請將右營所屬苗民仍撥歸乾州同知管轄其中前兩營所屬苗地則仍令鳳凰營通判管轄庶分治均勻而沿邊苗務不致貽誤

矣

以上數條皆係緊要邊務伏乞

皇上敕諭楚省督撫迅速辦理毋致任延實於邊方大有裨益謹

奏

將所條奏各事宜呈詳該督撫聽其酌定

湖南辰永靖道臣王柔謹

奏為奏明邊務事竊臣查得辰靖兩屬地方寬廣臣

自蒞任以來為辦理永順與六里事務未獲巡歷
周遍今於本年四月後復於各屬地方親身遍歷
詳察情形及水陸道途其中猶有防範疎畧與水
路阻滯尚須籌畫之處謹抒管見為我

皇上陳之

一辰州協營既設副將與中軍都司駐劄府城而
左營守備亦住城內實屬曠閒查辰州府西南邊
隅有沅陵縣之六堡與瀘溪縣之六堡兩界交聯

多係崇山峻嶺與永順苗疆接壤土民愚悍每多為非動輒拒捕請將該協守備酌帶本營兵丁移設於六壘六堡之適中地方駐劄再請將鎮草浮設兵丁撥給五十名以資彈壓兼為永順且武營之掎角則官兵皆得實用而頑民悉知顧忌矣

一沅州地方延袤千里苗犛雜處上接滇黔下通辰常實為楚省西南之緊要門戶向設偏沅巡撫及總兵帶兵二千餘名駐劄彈壓迨後巡撫移駐

長沙而總兵又移設鎮筸該地則改設副將至今
查額兵則僅六百九十名除分防及各官親丁公
費等項外存城兵丁僅一百七十餘名兼多護送
差遣雖從前各副將屢有添兵之詳請俱未准行
臣因查黔邊北面一帶苗夷寬廣多與沅界通聯
揆諸形勢殊覺單寡不得不懇請我

皇上俯察黔楚兩省交界輿圖則沅州疆圉之有關緊
要及營制之單寡與否自在

聖明洞鑒之中再沅屬西南之晃州地方遠去州城一百二十里請於沅州協營添兵五百名並設守備千把各員以資分布協助更於晃州地方酌撥守備帶兵分防以為楚省邊地之藩籬更為黔疆各營制之掎角況官兵更無需增添臣查湖廣提標五營俱駐常德城內並無分防之處是即於提標官兵內按數抽撥沅州駐防非惟提標不覺其寡少且楚黔兩界更獲大彰夫

國威矣

一靖州協營分防本州及會同通道兩縣幅員幾二千里地多崇山複嶺苗瑤雜處與黔粵接壤實屬險要及查該營額兵則僅四百八十五名一切汛防城守俱屬單寡現經該副將詳請增添尚未議准臣伏念該協營係楚粵黔三省苗夷極邊不得不懇請我

皇上敕諭楚省督提將鎮筸浮設兵丁內撥給二百名

以資靖協之分布防守則一轉移間而兵獲實用其極邊地方永受寧謐之福矣

一靖州併所屬三縣城多殘廢靖州舊係石城綏寧會同兩縣亦係石城堞口殘毀城墻傾圮惟通道一處原係土城並無城堞今更坍塌查此各州縣城垣俱經該員請修未准今不得不懇請我

皇上俯念邊城為內地之藩籬關係匪輕

敕諭楚省督撫令發公項修造並嚴飭該州縣確實估

計毋致浮冒至通道城垣圍圓不過里餘地近山
嶺取石甚易其修築費用不繁懇乞亦令建造石
城庶垂久遠

一靖州河道上至黔省黎平府屬地方下通辰常
大江現今黔省古州採買軍糧皆由此河裝運今
查有會同縣界內之大鼎小鼎牛步亂石等灘極
其陡險船隻最易損傷懇祈

皇上敕諭楚省督撫立飭該州縣確實估計請發公項

開濬務期寬平以利舟楫

一靖屬綏寧縣地處苗邊歷來盜案堆積自雍正五年於黃桑坪添設遊守官兵分布彈壓而靖屬頑苗近多遵法惟隣界寶慶府屬城步縣之長坪大寨等處兇苗越境焚劫肆無忌憚往往拒捕此實由該管文武從不於該地議設營汛居中彈壓故致有恃險猖獗之積弊且查城步汛地係武岡營屬該營額兵四百餘名僅防此一州一縣且該

州北居城步腹內民多瑤少平素安靜而該遊守則帶領多兵駐劄州城至城步則懸寄武岡之南面極邊兼與粵瑤隣界姦宄潛藏素稱難治今僅派委微弁帶兵分防此本布置錯繆邊患安得消除懇請我

皇上敕諭楚省督提於城步之長坪大寨等處相度地方將武岡營遊擊令酌帶本標兵丁移駐分布彈壓則城苗自無不畏法而歸化矣

以上六條臣謹繕摺具

奏伏乞

皇上睿鑒施行謹

奏

此所奏六條亦言之該督撫斟酌可也

湖南辰永靖道臣王桑謹

奏為跪呈

硃批恭謝

聖訓事竊臣於本年正月內以籌畫治理邊疆等件繕
摺陳奏蒙我

皇上不棄芻蕘俯垂

天鑒至於臣識之庸鄙有過於瑣屑之處更仰邀

聖恩訓示臣跪讀之下感激難名今將奉到

硃批原摺理合跪封呈

進謹

奏

觀汝頗有下愚不移光景

湖南辰永靖道臣王柔謹

奏為恭謝

天恩事竊臣於本年六月十五日接閱邸鈔見臣父王

游仰荷

皇恩簡授太常寺卿仍兼光祿寺卿事臣伏念臣父子

何人而乃叨沐

殊恩異數若斯寵榮逾分感戴無地惟有益竭忠誠赤

心圖報以上答

天恩於萬一所有感激微忱理合繕摺奏

謝伏乞

睿鑒謹

奏

陞遷降革正在未定

湖南辰永靖道臣王柔謹

奏為恭謝

天恩仰祈

睿鑒事竊

臣

接閱邸鈔見山左東兗二府歉收叨蒙

皇恩散賑減糶復

簡命

臣

父王滂同本省人員前往查賑此誠欲民隱無

蔽賑恤周遍實屬

曠典

臣

本籍山左身受

殊恩益時凜報稱未至隨即寄字

臣

父王滂務期查賑

周密俾饑民無一户之或遺庶無負我

皇上委用之至意所有臣感戴微忱理合繕摺

奏謝伏乞

睿鑒謹

奏

汝父於此一差辜負朕恩處不可枚舉

湖南辰永靖道臣王柔謹

奏為據實奏明事竊臣自歷任苗疆以來惟時時仰

體

天心凡一應辦理新開事務期籌畫妥協不敢因循
稍留遺憾今因永順境內尚有更改布置與議辦
未妥之處謹分析陳

奏

一永順所屬王村河南之田王二崗及功冲西英
四旗地方幅員二百餘里皆崇山複嶺頑苗雜處
遠距該府百里之外臣前議於喜鵲營設同知一
員以司捕務又設田家崗巡檢一員以備巡查俱

行移司轉詳

題達奉

旨依議欽遵在案及至雍正八年春前任藩司楊永斌並未查勘即議將喜鵲營同知改駐旦武營田家崗巡檢移駐舊司治但查旦武營不過永順東南邊隅臣已議設官兵防禦若復以同知移駐則西去保屬寫遠實舍中而處偏至於舊司治則去永順府城僅二十里若以巡檢移駐更屬棄遠而就

近臣因見其議改未協當即札移藩司兼稟明督撫未見允行今於本年四月內據沅陵縣詳報永順縣民張志賢等打傷劉名科等四人一案又據永順縣詳報該縣民石教化等打死石往哥等四人一案查此二案人犯悉處功冲兩旗地方現今嚴飭該縣移營查拏審擬是則該同知巡檢之駐劄地方更置錯繆已有確據臣何敢不據實奏

聞仰祈

皇上飭諭楚省督撫仍查照臣之前議各令移駐管轄
庶就近治理大獲裨益再該同知駐劄苗邊其於
所屬地方時應巡查化誨需兵護衛請於鎮筸浮
設兵丁內撥給五十名跟隨駐劄並令附永順協
營造報

一永順府縣城垣宜築建石城查該地土性不堅
取石甚易議令建造石城需費無多臣前曾與陞
任藩司楊永斌面語未見允從業經詳請

題達悉建土城今復據永順府稟稱邊地土質多沙
各衙署所築圍牆隨築隨圯若城垣築土更高萬
難保其堅穩等語臣伏念邊徼城垣係內地之藩
籬尤宜預圖久遠不得不懇請我

皇上敕諭楚省督撫仍令築建石城嚴飭該府縣確實
估計勿得浮冒庶新建邊城咸獲鞏固之慶臣謹
繕摺具

奏伏乞

皇上睿鑒施行謹

奏

言之督撫臣酌定奏聞

湖南辰永靖道臣王柔謹

奏為奏明事竊照楚南各府州所屬地方多山嶺重
複產鐵之處甚廣雖歷來禁止開採然私行創挖
者終難杜絕伏查新例嚴禁廢鐵出洋而楚南產
鐵各地方外來射利商販悉於就近設爐錘鍊下

船裝運赴湖北漢口發賣或由漢口而轉運兩江
遞販臣念由江入海其勢甚易若不設法稽查則
姦商圖利或私販出洋亦未可定不得不懇請我
皇上敕諭楚省與兩江督撫於各關口處所嚴飭該員
稽查俾不得私販入洋至楚南之各商販鑪煉鐵
斤應否輸稅之處更乞

皇上敕部查例施行庶公私兩得其便矣謹

奏

候另有諭旨

湖南辰永靖道臣王柔謹

奏為披瀝愚衷仰祈

睿鑒事竊臣自雍正六年正月荷蒙

天恩簡任苗疆歷今五載仰叨

聖訓隨事敬謹辦理不敢稍有疎忽除六里開闢業經

二年凡該管文武熟悉風土兵苗相安臣復於所

屬辰永靖各地方遍歷查勘其於治理事務又有

湏籌畫之處今更另摺

奏明倘蒙

聖鑒如可採擇惟懇

敕諭楚省督撫公忠為心切飭各該管文武實心奉行
以專責成而地方自無遺憾但臣惟念受

恩深重圖報心切每懷惟日不足且近閱邸鈔見有準
噶爾小醜之跳梁致以調兵選將上履

聖懷臣每中夜徬徨跼蹐靡寧此正為臣子者各當殫

精竭力奮往圖報之日也但念西粵之地勢與逆賊之情形兼我軍之所以料敵制勝者臣俱未得與聞雖欲獻管窺之計謀實阻於難以遙度跪懇天恩准臣馳驛赴京匍匐

殿陛敬聆軍務情形臣亦得於近屯遠戰之法權度變通以竭陳芻蕘倘有可採即跪請

聖訓折中機宜試諸軍政俾臣得仰仗

天威自效犬馬微力圖致逆賊之敗亡以上報

聖主之知遇於萬一若夫僻處而安居者實微臣之所
深恥也為此瀝忱具

奏伏乞

皇上睿鑒施行謹

奏

真可謂思出其位大言不慚也

湖北按察使臣王柔謹

奏為據實奏明事竊臣在辰沅靖道任內因辦理苗

疆事宜需人協助查有臣之舊屬原任黔陽縣知縣王作人明白老實堪以驅策隨於雍正七年三月內繕摺具

奏奉

旨准臣留用歷今四載有餘該員於苗土新疆事務俱隨臣跋涉幫辦寒暑莫避允屬勤慎臣查該員革職之案係因前任叅革知縣武宏登開報

皇賞老婦銀一十五兩零屢喚該家屬未到存貯縣庫

致以不先查首附叅其銀兩隨經解部今臣奉

旨陞任湖北所有新疆事務俱已告竣謹將王作人幫

辦勤慎緣由據實陳

奏懇請

聖恩可否念其急公微勞准令赴京引

見恩出

聖裁伏候

皇上批示遵行謹

奏

詳明該撫將王作人送部引見可也

湖北按察使臣王柔謹

奏為敬陳管見仰請

睿裁事竊臣謬荷

聖恩莅任苗疆每見黔省咨調湖南兵丁策應俱令多
派鎗手而需用火藥必取給於湖北因湖南向無
藥局其各營火藥又皆存貯無多不敷接濟臣伏

思腹地悉有城池倉庫防範宜嚴其沿海沿邊尤
關緊要火藥一項與其酌籌於臨事何如預備於
平時與其調撥於他方孰若取用於本處遠近遲
速之間所關匪細且楚省如此他省可知仰請

皇上敕部行令各省督撫提鎮查明各地方險易酌定
存貯多寡轉飭各府州縣會同營汛查原存火藥
若干及應湏酌添若干如有多貯之處准其均勻
移撥如無存貯則請動正項置備每於歲底令營

員造具實貯冊結呈請報部查核庶為有備無患
再查各處礮位率多收貯不謹雨淋日曬每致銹
朽無用臣愚以為亦應查照地方險易酌量多寡
數目勻撥存留飭令加謹收貯勿致銹朽似亦整
飭武備料檢軍實之一端也如果芻蕘可採伏乞
皇上敕議施行謹

奏

言之督撫二臣

湖北按察使臣王柔謹

奏為敬陳苗民感化情形及現在措置事宜仰祈

聖鑒事竊查六里地方自蒙

恩開闢以來俱各嚮化維殷輸誠恐後臣於上年冬月

間復遍巡各里村寨親見苗民悉歸馴順凡向之
荷戈執械日以防仇報冤為事者今俱出入無阻
彼此相安鎗刀棄置不用即如近奉

恩旨許令兵苗結親其已完姻之苗女俱自幸有衾裯

衣履之安且鼓樂迎娶伊父母更欣以為榮而旁
觀村寨苗婦因咸以赤足露體為恥是以苗人等
爭先央媒樂與兵丁結親往來歡洽兵苗大相親
睦至該協營有奉

旨准存苗糧二十分為賞勸辦事苗目工食臣即率同
文武官弁於六里大小各寨分別苗目等次均勻
散給俱知感戴

天恩急公踴躍分管約束已得振裘挈領之要矣惟是

苗俗崇尚巫鬼宰牛還愿之積習牢不可破臣仰

體

聖心屢以勿宰耕牛詳晰開導伊等亦頗知覺悟但據稱若不宰牛恐鬼祟難脫近見內地多有菩薩廟宇傳說鐘鼓聲響鬼多聽聞遠去懇求建立廟宇請供菩薩懸置鐘鼓以驅逐鬼祟等語臣迎機化導即為相度地勢捐俸造寺延僧焚修講解輪迴懺悔俾知茹素持齋可以消災延壽諒行之數年

苗民不信鬼崇則宰牛惡習自除矣統俟梵宇告

成之日恭請

隨機化導此舉可嘉賜名似屬無謂

欽賜嘉名俾得萬世瞻仰再六里苗日向臣悉稱從前
阻隔邊隅與禽獸無殊今蒙

皇恩安官設汛得見天日感戴難報聞知有採辦

萬年吉地木植伊等俱於該地山林查有合抱楠木急

圖恭

進但因不諳河道水運維艱臣見苗民一片血誠不

便壅阻已與督撫言之聽其酌議合併奏

聞伏祈

聖鑒謹

奏

苗目進獻之說當婉詞却之汝與督撫臣酌量其木植
如果可用給以厚價酬之為是

湖北按察使臣王柔謹

奏為恭謝

天恩事竊臣接到家信知臣胞弟王檢中式新科二甲
進士

欽授翰林院庶吉士臣隨恭設香案望

闕叩頭祇

謝訖伏念臣父王潯以革職之員仰荷

殊恩歷階卿寺臣以邊隅同知疊膺

宸眷畀以楚北臬務今臣弟王檢少年新進更蒙

聖主洪慈准令讀書中祕臣一家父子兄弟不識何修

而叨沐

天恩有加無已若此也惟有矢竭悃誠力圖報效并字
囑臣弟龜勉學習勤謹行走以仰副我

皇上栽培之至意臣曷勝感戴悚切之至謹

奏

凡為人臣者但宜講求一身盡職之道不必牽纏弟兄
手足以及子姪親友此即營私之巢窟不可不知

湖北按察使臣王柔謹

奏為奏明事竊查湖北贖鍰銀兩例係各屬申解臣
衙門貯庫其題咨案件聽候部覆彙批搭解若係
督撫批斷追貯之項名為外結或動用修造救生
船隻及給水手工食或修蓋監獄或賞給捕役等
項悉屬地方公務詳請督撫批准支銷從不報部
但臣查康熙七年五月內刑部議覆御史徐旭齡
條奏嗣後凡州縣等官自理贖鍰歲底造冊申報
臬司查核藩臬自理贖鍰造報督撫查核督撫彙

造清冊俟題報到日查核如有折多報少竝隱漏等弊該督撫查叅治罪等因具題奉

旨依議欽遵在案今湖北從前外結贖鍰悉於本地公務動用未經報部實與原題定例不符此係臣衙門經手錢糧何敢因循緘默理合

奏明請

敕下督撫嗣後一切外結贖鍰務於奏銷時彙造簡明清冊將公務動用各項悉於冊內註明報部查核

庶與原題定例相符并可杜日後侵漏之弊矣是
否有當伏乞

皇上睿鑒施行謹

奏

此係汝任內事詳明該督撫題請方屬合宜

湖北按察使臣王柔謹

奏為請禁各營長支之弊免致虧缺攤賠事竊查兵
餉馬乾例應扣除小建每季各營差弁請領藩司

率將全季餉乾悉照滿數給領回營存貯名曰長支有於下季請領時將上季小建扣存銀兩抵作應領正數者亦有賄通藩司書吏拖延壓捺至數季而尚不扣清者每致不肖營員任意侵那虧缺一遇事故離任水落石出於是經手錢糧之弁目事出無奈往往以甜言好語婉勸闔營代為攤賠分認實於兵丁不無貽累臣思月建大小儘可預為扣清毋庸長支以啓侵蝕之漸請

敕部通行各省嗣後按季給發餉乾之時即將小建銀
兩扣存藩庫如有書吏通同受賄仍前作弊長支
者查出嚴加治罪庶營員不致侵那兵丁永免攤
賠之累矣是否有當伏乞

皇上睿鑒施行謹

奏

該部議奏

湖北按察使臣王柔謹

奏為奏明事竊查湖南永綏協營設兵一千六百名均由外營先後抽撥其中多有年貌不符者臣於道任內兼理副將事務曾將不符緣由通報督提并飭令都守逐名清查造報繼因陞授湖北赴任倉卒各冊未據造齊自應接任副將催造惟是營員舊習多以糧名年貌先經達部有案只可陸續報換碍難總造臣念永綏係新設邊營與內地不同且武備務求實濟未便留此不符冊籍致滋弊

竇似應飭令該管協營逐一查造實在年貌達部
實於邊營有益為此繕摺

奏明伏乞

皇上睿鑒施行謹

奏

言之督臣邁柱飭行接任副將查造可也

湖北按察使臣王柔謹

奏為請定審案報駁核批之例以省拖累事竊照

欽部案件以及命盜重情州縣審招解府之時一面將
供看開造方冊先行通報名曰樣招其州縣審擬
未協之案經知府駁回知府審擬未協之案經臬
司駁回者各將駁由通報立案此現行之成例也
若即將駁語與樣招兩相比對則招擬之是非與
駁飭之合否固已洞若觀火矣乃今之報駁者或
止云供情可疑引擬未協已經駁飭等語或全錄
駁語止用驗文申報而院司衙門每將樣招與駁

文置之高閣不為核其是非及至府解司而司始
駁查司解院而院始駁飭其未經到司到院之先
率皆因循怠忽更或有所瞻顧每於解到後復藉
端苛駁以致案件不能速結無辜枉受拖累甚非
大吏公忠辦事之道臣請嗣後凡知府駁州縣之
案令將駁語改用詳文報司即取州縣樣招與駁
語細加確核將應駁與不應駁并未及駁到之處
秉公批示則案經知府報駁之後便有成規其知

府審定解司亦令將樣招通報督撫如尚有情罪未盡允協及犯證口供互異臬司必須駁審者亦將駁語詳報督撫即將知府樣招核明批示則一經解院覆訊便可立時具題庶案件易於連結而人犯免致拖累矣是否有當伏乞

皇上睿鑒施行謹

奏

該部議奏

湖北按察使臣王柔謹

奏為奏明事竊臣案查本年六月初八日據南漳縣知縣孫叔諫通稟內稱

計叅典史周世榮於正月內打傷刑書李緒經職差押隨即潛逃於五月內挈回因其辱及祖父當即薄責稟府提訊而世榮又肆口誣蟻等情隨經督臣檄行藩司以世榮已經

計叅例應候文處分不合罵毆行兇該縣擅行扑責

亦屬違例並如何誣鱓情由飭令會臣確查旋據襄陽府通詳孫叔諫於上年九月內指借

計典名色得受典史周世榮銀十二兩又先得過生日禮銀四兩係總吏朱若錦經手又世榮於被叅不謹之後打傷刑書李緒叔諫將世榮鎖押世榮潛逃後被拏回先責後枷等情臣即具揭稿密送藩司鍾保會行當據字覆今早奉督憲面言此案已批會同查例稿內未經聲明容俟明早面為商

定次日鐘保至臣署云總督說此係叅後反噬即日果奉督臣批仰會同查例詳叅夫以督臣之批檄合之鍾保之面言則是指此案為反噬也明矣臣查叅後首告例不准行但事關行賄受贓何敢置之不問兼奉撫臣批飭查明詳叅當即轉行該府至八月初二日據該府詳稱審明朱若錦供認過贓是實援縣教互揭之例將周世榮并朱若錦等批解前來臣當同鍾保會訊供詞無異但孫叔

諫未經到案對質難以遽定為實遂將應否題叅
究審抑或先提叔諫到案發武漢二府審實詳叅
等情會詳奉撫臣批仰速確查詳叅奉督臣批仰
即飭提到案發審隨即行提孫叔諫到省發武漢
二府確審據該府等轉據江漢二縣訊供詳解臣
隨會同署藩司朱溜弔集覆訊據朱若錦自供贓
銀係伊中飽臣恐係賄囑改供遂加刑訊矢口不
移臣等揆之情理叔諫如果得贓何敢於

計典內參揭世榮而復行枷責是中飽之供確有可信但叔諫即未得贓而昏庸失察違例濫刑亦難姑容當即會詳請參革職業經撫臣會疏

題參在案但係

計典屆期參員行賄之事有關督臣會核臣不能以反噬詳結未免有觸督臣之怒所有此案前後情據實二字恐未必然由相應據實

奏明伏祈

皇上聖鑒謹

奏

此案朕未親理從何定汝是非又據奏稱觸怒督臣等語果係因公抑或因私其中情節全未明晰豈聽汝一面之辭遂乃譴責上官而嘉與下吏乎若然則朕為先入之言所惑矣

湖北按察使臣王柔謹

奏為奏明事竊臣案據前任襄陽縣知縣今陞襄陽

府同知徐宗爽通詳一件為打死弟命事雍正十年十二月初八日據縣民陳之捷指報趙雲成等

於初六夜打死伊弟陳之欽相驗顛門右眉叢左鼻孔刀傷左耳輪右手指咬傷腎囊揪傷訊供未認經督撫暨前署臬司朱溜批行確審去後十一

年六月十二日據襄陽府詳據徐宗爽詳稱審明趙雲成並未殺死陳之欽請行保釋另緝正兇臣查核原卷初六夜趙雲成同陳宏聖等至陳之捷

家報信云之欽身死之捷即云必是趙家人打死
雲成隨即跑避情有可疑駁令確審九月二十三
日據該府詳據署襄陽縣張鍾秀請照原詳將趙
雲成保釋報叅仇盜未明臣查閱詳內敘有陳之
捷在府告詞內稱前縣審訊雲成曾經供認等語
何以前詳刪除不無疑竇又即駁審十一月初八
日據該府詳解前來臣隨親訊趙雲成始猶狡飾
畧加究詰便稱求提趙士奇到案究就伸了當即

飛提趙士奇質對據雲成供士奇從前打死陳淑
玉賄買件作用藥掩傷捏稱中毒被陳之欽擦去
敷藥驗出傷痕問成絞罪買通屍親假做獨子留
養所以懷恨去年十月十三日拏十五兩銀子與
小的要小的同去殺害至十二月初六夜殺死陳
之欽是他帶一把小刀殺的腎囊的傷也是趙士
奇揪的而屍兄陳之捷亦稱陳之欽從前為堂兄
陳淑玉被趙士奇打死帶領陳子玉告狀及擦洗

屍傷是實訊據趙士奇雖不認謀殺陳之欵情事而假捏獨子留養之處則自稱係用銀六十兩買陳家出結且將有兄趙士璧有弟趙士璜直認不諱隨查舊卷亦係徐宗爽任內據陳子玉告趙士奇於八年十月十九日打死伊兄陳淑玉驗有眼胞腎囊二傷將趙士奇擬絞以該犯之母薛氏年七十二歲家無次丁附請留養九年七月內准到

部文奉

旨趙士奇從寬免死減等發落准留養親經前臬司唐

繼祖欽遵轉行在案臣思趙士奇從前打死陳淑

玉被陳之欽洗傷擬抵賄捏留養則其懷恨之欽

黑夜殺害似為情之所有且該犯既非獨子則前

案亦難寬縱除駁發該府將趙士奇假捏賄買各

情一併審明取應叅各職名分案招解并報明督

撫外但此案有干從前承審出結各官處分而徐

宗爽又係督臣題陞之員臣益將不免於嫌怨理

合預為

奏明伏乞

皇上睿鑒謹

奏

公則何妨倘私而復私自必觸怒而益觸怒矣仍如前
摺批諭

湖北按察使臣王柔謹

奏為瀝陳苦衷跪懇

天鑒事竊臣自雍正六年春陞授道員蒙

皇上特恩著臣摺奏臣惟感

高厚難酬凡事關

國計民生者知無不言言無不盡未免觸督臣之避
忌積恨日久但從前遠處苗疆猶不過牌票文案
之間受其斥辱臣何敢瑣瀆今臣仰荷

聖恩陞任湖北臬司惟知謹守理法凡遇事案有情罪
可疑者臣俱詳加究訊一經審出冤抑則承審各

官均有處分而保薦之上司亦有干礙督臣不無
即此一事而論其過在汝

蓄怨在心近復因偉璉受賄一事臣以案多疑竇

不能瞻顧阿從於會詳未敢書行益致督臣怒不

果係美玉人自無瑕可指

可解遇事尋釁如臣所奏贖鍰一事奉

硃批此係汝任內事詳明該督撫題請方屬合宜臣當

經具詳而督臣即斥臣為多事更如兵餉小建一

事經臣具奏而督臣復厲言變色將臣痛加詈辱

臣惟念

朝廷莫如爵倘稍露詞色督臣必謫臣以倚恃
君恩目無

國法致臣難以自剖是以俯首忍受笑面相迎孰意
見臣順受不抗習以為常於僚屬同見之際有議
論未合者輒肆行怒罵幾視臣同奴隸矣臣既不
能曲就勢必受罵無休但臣職任提刑為通省各
府州縣之表率似此屢遭挫辱而竟一味忍氣吞
聲臣亦幾成陰險小人觀瞻不雅我

立品之道汝竟全然不知
皇上亦何樂有此無品之臣耶
所有屢辱難受屈衷不

得不跪懇

聖慈之垂憐臣曷勝惶恐待

命之至謹

奏

觀汝自莅任道員以來一味任性縱肆凡所陳奏躁言
妄論十居八九率不可行朕悉予寬恕者念汝存心尚
有效力之誠耳近日所奏彌覺狂誕不經頗露恃恩使

氣景象果如此則是在上既無表率之能在下又無遜
順之雅乃為朽木糞土之質不堪雕琢造就朕從前望
汝成汝之意誤矣嗣後若猶不知改悔勉勵一經督臣
邁柱叅劾必嚴加懲處不汝姑貸當切加詳慎莫負恩
諭

湖北按察使臣王柔謹

奏為請綏邊土事竊照容美土弁田畝如不法經督
臣題叅奉

旨着來京詢問嗣因該土弁懇請寬限至今未報起程
前於十月二十五日臣接督臣密札據夔陵鎮稟
稱容美斑竹園等處土民男婦三百餘人逃出鄔
陽關等情當飭歸巴等州縣安撫去後茲於十二
月初四日復接督臣密札奉有檄問田旻如看伊
如何回覆一面就近酌調官兵詳籌妥備之

上諭密鈔轉行到臣臣查田旻如倚恃土職恣意妄行
我

皇上屢加赦宥仍不悛改今復蒙

聖恩寬大暫停革職着令赴京詢問理應即日起程何
得藉詞寬限如果剋期就道情猶可原倘仍復推
延自應加以兵威使知懲戒從前永保桑等處臣

仰承

聖訓敬謹辦理竝無滋擾今容美情形臣久悉其大槩
且現任楚省更當身任其事懇請

皇上准臣總任辦理撥帶官兵前壓該境先於附近諸

土司宣布我

皇上德威曉以大義悉使安靜絕其附和即擇能幹土
弁傳諭田旻如開其愚蒙使知覺悟諒不待張弓
發矢自可輸誠倘仍負固執迷逞其螳臂只須分
佈附近各營官兵四路堵截伊自困於範圍之內
便可設計就擒而使邊土永臻綏靖也但必事權
歸一呼應始靈更懇

皇上將一切機宜准臣措置調度無致將弁掣肘庶臣

得以悉心籌畫慎重辦理一勞永逸斷不致有輕
率孟浪及遲誤事機之虞耳除經回明督撫二臣
聽候示行外臣謹恭摺

奏請伏乞

睿鑒俯賜俞允施行謹

奏

觀汝似有瘋顛之疾不然何狂誕至於此極也

湖北按察使臣王柔謹

奏為再陳管見敬請

睿裁事竊臣前以通裕民食之法請於秋成確探上游
豐收之處差員領銀前往採買至次年青黃不接
之時減價平糶繕摺陳奏業經奉

旨發議惟是豐收地方一經各處差員赴買恐一時米
價昂貴更不得不為籌及臣查豐收之地其米價
未得平減者多因富商大户恣意囤積所致若必
強之使賣恐有不肖胥役藉端滋事而需食之民

仍未均沾實惠臣再四思維有不禁自除之法莫善於各省府州縣遍開常平倉捐穀之例以備積儲以資轉運也蓋富商大戶蓄積銀穀每思遇開恩例急公上進祇以開例之地離鄉寫遠不能自赴上納輒轉託親友順帶包捐不無多用盤費且有被騙重納者以故率多觀望今若於各省府州縣悉開常平捐穀之例使本地之人即於本地親身上納既無詐騙亦免盤費節省穩便凡有米穀之家

無不踴躍一遇豐收之歲米穀必半在官而半在民矣其所收穀石遇有鄰省差員赴買價銀收貯藩庫即可碾米撥發領運則鄰省採買之員不必求米穀於市而止問米穀於官自無市價高昂之患而囤積者更無所容其姦如有謂捐多米貴者殊不知本地收捐之穀即可於本地隨時碾米減價平糶更不須遠謀於他省尤為便捷似於通裕民食之計大有裨益如果臣言不謬伏祈

皇上敕部議覆施行謹

奏

此奏是然尚非其時須待可行之日再當斟酌

湖北按察使臣王柔謹

奏為敬陳管見事竊查私鑄律禁綦嚴而江安豫楚各省界連地方仍不能盡絕者則以制錢尚少不能遍處流通故私錢猶有雜用之處也欲絕其弊務須多為鼓鑄使官錢充足而私錢自除惟是制

錢工本浩大各省銅鉛轉運維艱自難悉為鼓鑄似宜擇適中之地開爐辦理使制錢四面流通兼須節省工本則莫便於武昌也臣訪聞鼓鑄之法每紅銅百斤白鉛百斤共鑄制錢二十千零八百文內除人工雜項三千一百一十四文淨得錢十七千六百八十六文以運京價腳而論銅每百斤約需銀十七兩五錢鉛每百斤約需銀九兩二錢是費銀二十六兩七錢之多而所得錢文尚不及

十八千值銀不及二十兩如積數千萬串而計之其貼賠銀兩不下數百萬

國家經費詎可不酌籌慎重乎查楚省採買雲南銅價每百斤交藩庫銀十三兩臣前據永綏協副將張鶴面言伊於雲南遊擊任內辦理東川廠務礦商所得賣價每銅百斤不過八九兩自東川而至武昌水陸運腳不過二兩五錢通計價腳二項不過十二兩其雲南藩庫收價十三兩於中不無浮

費且責令楚員赴買滇省不無歧視價必昂貴宜
令滇省廠員照實在價值收買開報即令滇員運
至武昌交收更可節省浮費至湖南郴桂等州縣
悉出白鉛每百斤價銀三兩三錢其滇黔所產白
鉛官買礦商價值不過三兩加以運至武昌脚費
總不過四兩有奇是合銅鉛兩項需銀不及十八
兩即可得錢十七千六百餘文絲毫竝無貼賠將
來節省何止百萬倘蒙

聖恩俞允於武昌設局開爐鼓鑄竝請

欽差廉幹部員至楚監督銅鉛兩便則制錢自多其鑄
出之錢即令江安豫蜀各省差員赴楚領回搭放
兵餉

國寶既得流通私鑄自可淨絕此臣芻蕘之見如有
可採伏祈

皇上睿鑒施行謹

奏

通盤議論皆係未見顏色之瞽說朕何暇一一指駁訓示汝此等愚頑也

湖北按察使臣王柔謹

奏為敬陳楚蜀水陸道途之險請

敕開闢疏鑿以利攸往事竊查湖廣入川大路由彝陵以至簡州多崇山峻嶺草木叢雜其濱江道路每係山頂懸厓窄隘尤甚下臨不測之淵倘值坍塌卸偏仄尚不盈尺行人乘騎失足不但無從救

援即身屍亦難撈獲至於水路除川省各灘不計外即以楚之歸州而論水大則有拽灘之險江心大石橫互中流舟行必迎石而放將次抵靠則湏急扭頭招從旁瀉下頃刻數十里勢不可遏故唐詩有千里江陵一日還之句倘操舟毫釐差謬即撞礮瓦裂莫可挽留若水小則又有新灘之險四面狼牙怪石中僅溶道一泓勢更衝激而湍下則係深坎數丈形同瀑布稍一誤觸雖巨艦立成齏

粉縱舵工水手十分諳習亦難保必無舛錯臣前
在湖南同知任內奉委解運川餉陸路而往水路
而回數濱於危至今每一念及輒魂飛天外近詢
之往來蜀中者亦莫不驚怖每歲每月之間行人
必遭覆溺貨物每被沉淪殊堪憫惻臣查夔關荆
關兩處稅課盈餘大倍往昔則知楚蜀道路百貨
轉輸商賈絡繹是此途既為億萬財賦之所關尤
為億萬生靈之所繫似應將礙水巨石及灘下陡
時無五丁何能施此

神力殊屬可笑之論

坎鳩工疏鑿使平庶水勢不致過激舟楫可保無虞其陸路之濱江者則宜酌加改闢寧紆程數日務使有實地可憑方不致誤墮淵阱也夫當日設險守國蓋為割據地利而言方今天下一家聲教四訖東西朔南悉在幅員版圖之內更宜使血脈流通周行無滯臣不揣愚昧懇請

敕下川湖督撫飭令夔巫歸巴一帶水路則估計疏濬

更為可笑之談矣

陸路則另闢坦途以及蜀省險峻之區一一查勘

修鑿平坦不特往來商旅咸祝我

皇上仁壽萬年即一切解運轉輸亦均資利便矣為此

謹

奏

觀汝屢次論奏俱屬狂妄不經莫非爾身果有瘋證耶
全不計及事之可否施行乃於君父之前矢口亂道是
誠何心大抵素性偏於粗浮所以但喜多事而不耐閒
靜耳

硃批諭旨卷一百四十二下



總校官庶吉士臣侍朝

校對官編修臣莫瞻菴

膳錄監生臣范從理